

S **LO**
Afl. 1.25

BRIYANDO FUERTE • TRECIENDO CLARIDAD
DIAMARS 28 APRIL 2026

Di Pueblo

Parlamentario Hendrik Tevreden:
**SITUACION NA AWSS TA
HOLE STINKI! INVERSION
DI 10 MIYON EURO TIRA UN
BANDA SIN SPLICACION!**



WWW.SOLODIPUEBLO.COM



SOLODIPUEBLO@GMAIL.COM

WARDACOSTA DI CARIBE HULANDES TA INTERCEPTA UN TRANSPORTACION DI DROGA



ARUBA A CELEBRA DIA DI REY CU CEREMONIA PROTOCOLAR Y MENSAHE DI UNION DEN REINO



Awo cu 2 florin mas, bo por gana e **MEGA PLUS**

* Afl. **2.100.000,-**

* Afl. 1.300.000,- + Afl. 800.000,-
extra

Benta ta sera 7:30 pm y sorteo ta hunga 7:45 pm



HUNGA AWO



PARLAMENTARIO EVELYN WEVER-CROES PRESENTE NA INSTALACION DI DIRECTIVA NOBO DI SCOUTING ARUBA

“Boso trabou ta di hopi balor pa nos comunidad”.



ORANJESTAD - Diasabra ultimo Scouting Aruba a celebra Sint Jorisdag na Wilhelminapark. Tambe momento a tuma luga instalacion di e directiva nobo di Scouting Aruba pa e periodo 2026 pa 2029.

Lider di fraccion di MEP tambe tabata presente y a felicita sr. Dave Martinus cu a wordo instala como Chief Commissioner di Scouting Aruba pa 2026-2029. Tambe a instala e directiva nobo di Scouting Aruba.

Den su discurso pa e

ocasion aki, Evelyn Wever-Croes a expresa su gratitud na e directiva y na tur e lidernan di Scout. “Danki pa e trabou cu boso ta haci pa nos comunidad. Awe mas cu nunca boso trabou ta importante y necesario

pa sostene muchanan, hobennan, famianan y henter e comunidad pa fortifica e fundeshi di nos pais cu e principianan di scouting. Tabata un honor di por ta presente na e ocasion special aki”



WARDACOSTA DI CARIBE HULANDES TA INTERCEPTA UN TRANSPORTACION DI DROGA

Barco di Marina Real Hulandes, Zr.Ms. Friesland a intercepta un transportacion di droga riba diahuebs 23 di april riba lama Caribense. E barco di Marina Real Hulandes tabata nabega bou di bandera di Wardacosta di Caribe Hulandes.

Riba diahuebs 23 di april, Wardacosta di Caribe Hulandes a tuma nota di un boto cu droga nabegando riba

lama Caribense. Zr.Ms. Friesland a reacciona mesora i tambe a manda dos boto tipo FRISC den direccion di e boto.

E tres tripulantenan riba e boto a entrega nan mes sin niun tipo di resistencia. E droganan y e tres sospechoso nan a ser entrega na miembronan di Cuerpo Policial (KPA) aya na Steunpunt di Wardacosta na Savaneta. Mientras tanto a destrui tur droga.



NISSAN MARCH A PERDE CONTROL NA JABURIBARI



Jaburibari - Diadomingo merdia 2'or pasa polis y ambulance a bay altura di Parke Curason, pa un accidente di trafico.

Polis a yega y a compronde cu tawata trata di 1 auto so

y e chauffeur ta herida.

E Nissan March pa un of otro motibo a baha caminda y bay na su man robes y termina contra un cashi coriente dilanti un cas.



Door di e impacto duro e chauffeur a resulta herida.

Paramediconan cu a presenta a transport'e pa Hospitaal pa mas observacion.



DOS PERSONA HERIDA DEN ACCIDENTE SERIO NA SERO BIENTO



Sero Biento - Diadomingo merdia rond di 1'or mey a sosode un accidente serio den Sero Biento.

Riba un crusada T, falta di preferencia a hunga un rol grandi.

Tawata den careda di 1'or y mey cu habitantenan a scucha un lastro di brake y despues e zonido duro.

E auto envolvi tawata un Kia Flatbed y un Nissan Skyline.

E impacto fuerte pero asina mes e ocupantenan a baha di e auto[flatbed] y sak den otro door di golpinan ricibi. Polisnany ambulancenana yega na e sitio cu urgencia, y ta topa cu e hendenan

riba caminda cayente.

Mesora Paramediconan a cuminsa duna asistencia y a preparanan pa bay Hospitaal. Dado momento den e tension, esnan envolvi a bay reclama e auto cu a dalnan.

Locual a sosode ta cu e Flatbed a subi e t-weg posiblemente sin mira e Skyline maneha pa un

hoben y debi na velocidad halto a dal contra e Flatbed. Un impacto fuerte mester bisa.

Segun habitantenan e parti ey ta peligroso, debi cu no tin bon bista den autonan cu ta bin di man robes.

Polis di trafico lo a haci uso di camaranan di seguridad pa por resolve e boksmento duro aki.



Parlamentario Hendrik Tevreden:

SITUACION NA AWSS TA HOLE STINKI! INVERSION DI 10 MIYON EURO TIRA UN BANDA SIN SPLICACION!

ORANJESTAD – Parlamentario Hendrik Tevreden a bati e alarma bisando cu e situacion di e ‘afvalwaterbedrijf’ AWSS ta hole. Tevreden a señala cu esaki no ta solamente pa e awa stinki, sino tambe pa e mal maneho y e perdida enorme di capital den e empresa estatal aki. E situacion preocupante aki a hiba e parlamentario na lansa preguntanan formal na Minister di Energia, sr. Arthur Dowers, exigiendo transparencia total riba e maneho di e planta.

Inversion miyonario saca for di servicio

Recientemente, profesionalnan di AWSS mes a confirma den Parlamento cu tin por lo menos 10 miyon Euro na makinaria di e compania Oblyses cu a wordo saca for di servicio sin un hustificacion concreto. Tevreden a pone enfasis riba e echo cu, te cu awe, Parlamento no a ricibi niun rapport cu ta indica e rasonnan pakico a saca e makinarianan aki for di funcion y tampoco no tin claridad riba kico lo ta e destino final of e futuro di e inversion miyonario aki. E Parlamentario a resalta cu ni e Minister mes a ricibi dicho rapport, locual ta confirma un falta total di transparencia riba un decision cu tin un balor financiero basta halto pa nos pais. Defecto tecnico of mal maneho? Pa Tevreden, e pregunta central ta simpel pero doloroso: Con por ta posibel cu un inversion di e magnitud aki ta wordo saca for di servicio sin un splicacion debido? Loke ta mas preocupante ta e falta di claridad:

- Defecto tecnico? - A cumpra algo cu no ta funciona?

- Tecnologia cu no ta cuadra? - A inverti miyones den algo cu no ta apto pa Aruba?
- Falta di training? - E personal no a wordo capacita pa opera e makinaria?

Si e ultimo aki ta e caso, Tevreden ta adverti cu esaki no ta djis un mal preparacion, sino un fayto structural den e plan di inversion y maneho di e Ministerio.

Modernisacion riba papel, holo stinki riba caya

Tevreden ta señala cu Gobierno ta “boca yen” pa papia di modernisacion y durabilidad, pero e realidad riba caya ta conta un storia totalmente diferente. Inversionnan di miyones ta keda tira un banda sin wordo uza adecuadamente, mientras cu e holo stinki ta keda persisti den e zona hotelero y awor a cuminsa afecta Parkietenbos tambe.

Loke ta mas preocupante ta e falta di vision: awo Gobierno kier busca mas placa pa muda AWSS pa Parkietenbos, apesarcu tur rapport ta splica claramente cu esaki no ta necesario. Pa e Parlamerntario, esaki ta un fayto structural den maneho: kier sigui gasta placa di pueblo den proyectonan sin base, mientras e problemanan real cu ta afecta comunidad ta keda sin wordo resolvi.

Gol bashi sin keeper?

Parlamentario Tevreden ta señala cu Minister di Energia, Arthur Dowers, ta e principal responsabel pa e situacion actual y diamars awor e tin e obligacion di duna cara den Parlamento atrobe. Ta



inaceptabel cu ta tuma decisionnan di e magnitud aki sin presenta un rapport cu ta fundamenta e rason real tras di e maneho of desicionan aki. Pa Tevreden, ta un wega politico tin, pa keda punta dede y djey laga e debe pa pueblo paga. Den e cuadro aki, e cuestionamento ta bay tambe pa e papel di e coalicion: Coleganan den coalicion ta controlando gobierno of ta laga gol bashi sin keeper?

E decisionnan aki no solamente ta perhudica esunnan cu ta sufrir diariamente cu e mal holo di AWSS, e daño na medio ambiente of nos turistanan. Pero tambe e confiansa di e ciudadanonan cu ta anhele y merece un bon gobernacion.

Falta di control y vision

Desde oposicion, nos posicion ta keda firme: e situacion actual ta refleha un falta total di control di parti di Minister Dowers. Su ministerionan ta demasiado grandi y tin un falta serio di vision y direccion. Pa Tevreden, esaki ta un caso cla di un mandatario cu tin “demasiado hooi riba su vork”, caminda e responsabilidadnan a surpasa su capacidad di maneho. E prueba mas contundente di e fayto di maneho aki ta e liheresa cu cual decisionnan financiero cu un impacto asina grandi ta wordo tuma: “Si facil asina ta saca 10 miyon euro na makinaria for di funcion, nos no tin un problema tecnico, nos tin un problema di gobernacion,” Tevreden a conclui.



Parlamentario Eduard Pieters (PPA):

“NOS MESTER CONSTRUI Y FORTALECE NOS RELACION Y POSICION DENTRO DI REINO HULANDES”

Durante su mision oficial na Den Haag, parlamentario Eduard Pieters di fraccion di PPA, a pone un enfoque distinto riba e rol di Aruba dentro di Reino Hulandes. Pieters a enfatisa cu Aruba no mester solamente ta un pais cu ta defende su posicion, pero nos mester busca e caminda pa bira un socio proactivo, cu ta busca na fortalece e relacionnan cu ta determina e futuro di henter Reino. Su mensahe tabata consistente durante tur e reunionnan: un Reino fuerte no ta construi cu presion of distancia, pero cu dialogo, comprension y confianza mutuo.

Relacion no ta automatico y mester construi activamente. Segun Pieters, un di e debilidatnan mas grandi dentro di Reino ta e falta di relacion directo entre e hendenan cu ta tuma decision. Hopi politico na Hulanda, no conoce realidad di Aruba profundamente, no ta conecta cu e contexto local y p'esey tin un distancia cu ta afecta e decisionnan. “Nos no por asumi cu nan ta comprende nos, nos mester crea e comprension,” Pieters a indica. Esey ta e motibo pakico su presencia na Den Haag no tabata simbolico, pero strategico, unda su rol tabata pa construi e brug, crea confianza y partnership y duna contenido real na e historia di Aruba.

Dialogo como instrumento politico, no debilidad

Den su encuentronan cu diferente partido, incluyendo esunan cu no semper ta alinia cu posicion di Aruba, Pieters a enfatisa importancia di dialogo sin barera.

“Relacion fuerte no ta construi cu e hendenan cu bo ta di acuerdo cu ne so. Ta construi cu tur hende cu tin influencia riba decision,” el a bisa.

E enfoque aki ta move for di un politica defensivo pa un politica proactivo, unda Aruba no ta warda pa haya invitacion so, pero ta bay directamente pa participa y dialoga cu contenido riba posicion di Aruba.

Un Reino mester ta basa riba igualdad y respet reciproco

Un punto central den su mensahe tabata, cu e relacion dentro di Reino mester evoluciona.

E relacion no mester ta uno cu ta basa solamente riba comparti un cuadro constitucional of cu tin un historia comun. E relacion real mester ta basa riba confianza y respet di ambos banda, transparencia y comprension di diferencia entre e paisnan. “Cada pais tin su propio realidad. Si nos no comprende esaki, nos no por construi un Reino fuerte,” Pieters a subraya.

Cooperacion como solucion pa desafio comun

Den lugar di mira e desafionan como problema di un pais so, Pieters a pone un otro vision riba mesa. Reino Hulandes mester colabora riba tema economico, comparti conocimiento y crea e oportunidadnan comun. Especialmente den contexto di cambio global, economia y presion internacional, e colaboracion aki ta bira mas importante ainda.

“Nos no ta fuerte separa, nos ta fuerte ora nos traha hunto,” Pieters a indica.



Un inversion den futuro di Reino

Segun Pieters, e bishita na Den Haag no tabata solamente pa e parti presente, pero tambe pa e futuro. Un futuro unda mester por crea relacion politico, fortalece contacto institucional y aumenta comprension mutuo. Di e forma aki Aruba ta inverti den un posicion hopi mas fuerte dentro di Reino. “Relacion ta algo cu bo ta construi cu tempo. Si nos no cuminsa awe, nos no lo haya resultado mañan,” el a bisa.

Pa Pieters, e mensahe final ta profundo pero simpel. Reino Hulandes no por funciona sin confianza, confianza no por existi sin relacion y relacion no ta construi sin esfuerzo consciente y consistente.

“Nos mester move for di un Reino di distancia, pa un Reino di conexion,” Pieters a conclui. “Paso solamente asina nos por garantiza cu tur pais, grandi of chikito, ta sinti cu nan tin un lugar real den e futuro di Reino.

Clasificados





SOLODIPUEBLO@GMAIL.COM
CEL. 585 9500



ARUBA A CELEBRA DIA DI REY CU CEREMONIA PROTOCOLAR Y MENSAHE DI UNION DEN REINO



Awe mainta a tuma lugu e ceremonia oficial den cuadro di celebracion di Dia di Rey na Wilhelminapark, cu presenciadidignatarionan, representante di gobierno y invitadonan special.

E acto protocolar a cuminsa cu recibimento oficial di Su Excelencia e Gobernador hunto cu

su distinguida esposa, y PromeMinisterMikeEman hunto cu su distinguida esposa, como tambe miembronan di Gabinete, parlamentarionan, representantenan di Hulanda na Aruba y e Corps Consulaire.

E ceremonia a inclui honornan militar cu presencia di e gewapende wacht, sigui pa inspeccion



oficial door di Su Excelencia Gobernador. Posteriormente, atumaluga e hisamento simultaneo di e bandera di Aruba y Hulanda, acompaña pa interpretacion di e Himnonan.

Durante e programa, e Presidente di Parlamento, Marlon Sneek, a dirige palabra na tur presente, como tambe Minister di Relacionnan di Reino, Enseñansa, Hoben y Deporte y Vice Premier Gerlien Croes. E ceremonia, complementa cu presentacionnan cultural, incluyendo musica y baile.

Un momento special tabata e entrega di premio den cuadro di Copa Hubenil Gobernador Felipe B. Tromp, reconociendo talento y dedicacion di e hobenan di Aruba.

Den su discurso, Prome Minister Mike Eman a pone enfasis riba e significado profundo di e

celebracion, resaltando no solamente e cumpleaños di Su Majestad Rey Willem-Alexander, pero tambe e balor di union y conexcion dentro di Reino Hulandes. Eman a subraya cu, a lo largo di generacionnan, e Reino a mantene un laso fuerte a pesar di distancia geografico y diferencia cultural, destacando cu e Cas Real ta sirbi como un forsa unificador entre e paisnan.

“Awor mas cu nunca, nos mester reconoce e balornan di solidaridad, proximidad y apoyo mutuo cu semper a caracteriza nos relacion dentro di Reino,” Prome Minister a indica.

El a recorda cu tanto Aruba como Hulanda a para na banda di otro den momentonan dificil, reforsando e sentido di comunidad y cooperacion cu a crece a traves di generacionnan.

Den e mesun linea,

Prome Minister a enfatisa importancia di reflexiona riba e balor di e Reino como un estructura cu ta ofrece apoyo, estabilidad y oportunidad pa tur paisnan miembro.

Eman a expresa su gratitud pa Su Majestad, resaltando su compromiso y interes sincero den bienestar di e islanan, particularmente durante su reciente bishita na Aruba, unda el a muestra interes activo den e desaroyo y retonan di e isla.

Finalmente, e Prome Minister a invita comunidad pa celebra e dia cu orguyo y reflexion, reconociendo tambe e aporte di deportistanan Arubiano cu ta pone Aruba riba mapa internacional.

E ceremonia a culmina cu repeticion di e Himnonan y despedida oficial di e Gobernador, marcando un momento di respet, union y orguyo nacional.

Ehempel bibo di comunitarismo den bario

PROME MINISTER MIKE EMAN TA APLAUDI INICIATIVA DI SAVANETA FOOD MARKET



Den fin di siman na Savaneta, a tuma lugar un actividad special cu a muestra e importancia di comunidad, produccion di agricultor local y desaroyo sostenibel. E proyecto di Food Market Savaneta no ta simplemente un mercado, pero un iniciativa cu ta pone enfasis riba fortificacion di bario, economia local y colaboracion entre diferente sector.

Prome Minister Mike Eman hunto cu su esposa Doina y tambe Minister Geoffrey Wever tabata presente na e actividad

compartiendo un mensahe di reconocimiento y sosten fuerte pa e iniciativa comunitario, resaltando e balor di colaboracion entre lidernan, organisacionnan y comunidad. E prome mandatario a expresa su aprecio pa e trabounan cu ta wordo haci, enfatisando cu e tipo di iniciativanan aki ta cuadra cu un vision di mas desaroyo humano y social, unda infraestructura, comunidad y bienestar di ciudadano ta central. Den su mensahe, Eman a pone enfasis riba varios idea importante: importancia di union den comunidad, desaroyo



basa riba solidaridad y colaboracion, balor di cultura, historia y identidad di Aruba, necesidad di crea espacionan pa encuentro social y cultural, reconocimiento di tradicion di trabao, pesca y agricultura como parti di identidad di pais. Premier Eman a haci mencion di e importancia di trabou boluntario y compromiso di comunidad. Aruba semper a basa riba colaboracion for di tempo di e pescadonan y cunukeronan cu tabata comparti nan producto, te na e dia di awe caminda union ta keda clave pa progreso. E tipo di iniciativa comunitario no solamente ta un evento, sino un forma di fortalece identidad, economia local y cohesion social. E evento a conta cu colaboracion estrecho cu Bureau Multifuncionele Accomodatie. Eman a termina na duna su gratitud y apoyo pa tur esnan involucra den e proyecto.

Norman

Thijsen,

presidente di Fundacion Savaneta, a comparti su entusiasmo pa e exito di e evento. Thijsen ta enfatisa cu e actividad a bay bon y cu e participacion di comunidad ta sigui crece, hasta den e show di talento y cultura. Un di e puntonan mas importante cu Thijsen a menciona ta e desaroyo di un idea nobo: Un mercado di cuminda di comunidad ta un espacio dedica na promove cuminda local, productonan varia, y empresario di comunidad. E proyecto ta destina pa ta un punto di encuentro semanal, posiblemente siman di diadomingo, den un ambiente habri, accesibel y familiar. E concepto ta ensera: espacio pa un food court y tent di cuminda, productonan local y tradicion culinario, un ambiente pa famia y turismo, uso di espasio habri y acceso facil pa comunidad, combinacion di cultura, cuminda y empresario local. Segun Thijsen, e iniciativa por yuda fortifica turismo na Aruba y stimula economia local, dunando

oportunidad na diferente empresario pa presenta nan productonan na un prijs competitivo. Ainda e proyecto ta den fase di planificacion, pero ya caba tin dialogo y peticion pa sosten di diferente instancia concerni, entre otro ministerionan cu tin di haber cu turismo, economia y infraestructura. Thijsen a duna su palabranan di gradicimento pa tur e sosten ricibi di instancianan manera Santa Rosa, Prome Minister Mike Eman y su Ministerio di Asunto General, Cultura, Naturalesa y Medio Ambiente, Minister Geoffrey Wever y su Ministerio di Finansa, Asunto Economico y Sector Primario.

E vision ta pa sigui amplia y fortifica e concepto di mercadonan local den diferente distrito di Aruba. Tambe Thijsen ainda mas e balor di MFA Savaneta e lugar perfecto cu por a realisa e actividad cu ta Savaneta Food Market.

PIETERS TA PONE LINEA CONSTITUCIONAL CONTRA HOFA NA DEN HAAG



Durante su mision oficial na Den Haag, parlamentario Eduard Pieters di fraccion di PPA, a eleva e debate riba Rijkswet HOFA for di un discusion politico pa un cuestion constitucional. Su mensahe tabata cla y huridicamente funda: loke ta den wega no ta djis politica, pero e integridad di e orden constitucional di Reino Hulandes.

Budgetrecht: e nucleo di soberania parlamentario Un di e pilarnan den e argumentacion di Pieters ta e defensa di e budgetrecht di Parlamento di Aruba. Esaki ta un derecho cu dentro di doctrina constitucional ta considera como un di e instrumentonan mas esencial y fundamental di control democratico. “Sin budgetrecht, Parlamento ta perde su esencia,” Pieters a declara. “Y un Parlamento sin poder financiero, ta un institucion sin contenido

real.”

Segun su analisis, HOFA ta crea un estructura, unda e decisionnan financiero clave por wordo influencia of condiciona for di nivel di Reino, debilitando e autonomia funcional di Parlamento di Aruba.

Un desbalansa institucional cu por crea precedente peligroso

Pieters a adverti cu e introduccion di HOFA, pa e cuadro di articulo 38, lo crea un precedente cu por bay mas leu cu djis un ley. “Si nos acepta esaki awor, nos ta habri porta pa mas intervencion den futuro,” el a indica. Esaki, segun Pieters, ta move Reino Hulandes for di un modelo di cooperacion entre e paisnan, pa un modelo unda centralisacion ta gana tereno, algo cu ta contra e espirito original di Status Aparte di Aruba.

Alternativa constitucional: supervision ancla den nos propio ley

Na lugar di un Rijkswet imponi, Pieters ta keda presenta un alternativa, cu ta respeta e orden huridico: un begrotingskamer ancla den Staatsregeling di Aruba, eventualmente reforsa via un landsverordening. E mecanismo aki lo fortalece control interno di finansa publico, duna transparencia y disciplina di bon gobernacion y mantene responsabilidad den marco di ley local. Esaki, segun Pieters, ta cumpli cu e meta di bon gobernacion, sin viola e principio di autonomia constitucional.

Reino Hulandes: igualdad huridico of control politico?

E debate riba HOFA, segun Pieters, ta revela un tension mas profundo

dentro di Reino:

Si e relacion entre e paisnan ta basa riba igualdad huridico of riba un interpretacion practico di control politico. El a enfatisa cu Aruba a demostra progreso financiero tangibel, incluyendo reduccion di schuldquote y estabilidad economico, locual ta debilita argumento pa intervencion externo. “Un pais cu ta cumpli, no mester wordo trata como un pais cu ta faya,” Pieters a subraya.

ta creando un desbalansa cu por mina e Estado di Derecho?

“Autonomia no ta un favor, sino un derecho constitucional,” Pieters a conclui. “Y ta netamente e derecho aki nos mester defende, no reinterpreta y bend’e pa conveniencia politico di algun politico.”

Conclusie: e lucha pa autonomia ta awor Pa Pieters, e proceso rond di HOFA no ta un discusion mas—ta un punto di giro historico.

- ☐ pa autonomia
- ☐ pa democracia
- ☐ pa dignidad di Aruba dentro di Reino

“Nos ta partner, no subordinado,” Pieters a conclui cu firmeza. “Y nos lo sigui para firme pa e principio aki.”

Clasificados










SOLODIPUEBLO@GMAIL.COM

CEL.585 9500



PRESENTACION DI WWW.GIO.AW NA MINISTER ARTHUR DOWERS

Diabierna mainta, Minister di Husticia, Integracion, Transporte Publico y Energia mr. drs. Arthur Dowers a haci un bishita na oficina di Bureau Integriteit Aruba (BIA), unda directora Marielle Meaux y su ekipo a presenta oficialmente e pagina web nobo www.gio.aw.

GIO, cu ta para pa Gedragcode Integriteit Overheidsmedewerkers, ta un herment strategico di Departamento di Recursionan Humano hunto cu BIA pa fortalece conocimiento y

comportacion corecto entre empleadonan publico. E plataforma ta duna guia concreto na empleadonan di gobierno pa nan por hiba combersacion riba (posibel) violacion di integridad cu nan superior of colega, basa riba e codigo di conducta oficial.

E iniciativa aki no solamente ta educa, pero tambe ta proteha empleadonan di gobierno. Door di identifica riesgonan na tempo y ofrece hermentnan pa maneha situacionnan delicado, GIO ta contribui na un cultura di



responsabilidad, confiansa y transparencia den e aparato gubernamental. Apesar di algun contratempo durante e proceso di desaroyo, personal di BIA a muestra compromiso y dedicacion door di percura pa finalisa e pagina na tempo. Durante un fin di siman di prueba,

nan a haci evaluacionnan final pa asina por implementa ultimo ahustenan necesario prome cu lansamento oficial e siman aki.

Ademas di e plataforma digital, BIA desde algun luna atras ta opera for di nan oficina completamente

nobo, situa na Henny Eman Boulevard 20, anteriormente conoci como oficina di Notario Yarzagaray. E espacio nobo aki ta reforsa e capacidad institucional di BIA pa sigui traha riba integridad den sector publico.

Minister Cicilia:

RAPPORT ANUAL DI AAA TA REFLEHA E DESEO CU NOS TIN PA ACELERA PROGRESO

Oranjestad, Aruba – Durante e reunion di e accionistanan di Aruba Airport Authority N.V., a presenta y trata e cuenta anual di 2025, un momento importante pa reflexiona riba con e compania a maneha e ultimo aña y e direccion strategico cu a tuma.

Segun Minister Wendrick Cicilia, e reunion a confirma cu 2025 tabata un aña marca pa progreso, disciplina y aceleracion. For di principio, Minister Cicilia a drenta cu un mentalidad determina y a comunica claramente cu liderazgo, gerencia y Hunta di Supervision mester traha den un solo direccion: fast track y entrega resultado concreto. Un di e prioridadnan principal tabata acelera e proyecto Gateway 2030. Esaki a exige alineacion entre tur partner y stakeholder envolvi. Awe, e cuenta anual ta muestra claramente cu e aceleracion di e proyecto ta visibel den ehecutacion, cu Phase 1A ya finalisa y cu Phase 1B ta avansando riba un caminda positivo danki na esfuerso colectivo entre liderazgo di AAA, contratistanan y e Ministerio di

Turismo.

Durante e reunion, Minister Cicilia a expresa su aprecio pa e colaboracion y compromiso demostra pa cumpli cu e peticionnan di Gobierno di Aruba. Esaki inclui enfoke riba maneho di forsa laboral local, cu enfasis riba retene, forma, cuida y promove profesionalnan local den sector di aviacion y operacion di aeropuerto.

Tambe a destaca e preparacion conhunto cu e autoridad di aviacion civil pa e audit di International Civil Aviation Organization, un proceso importante pa certificacion y reputacion internacional di nos aeropuerto. Aruba ta continua traha pa mantene cumplimiento cu regulacion y standardnan internacional, protehando e posicion di nos aeropuerto den mercado global.

Entre e logronan importante resalta den 2025 ta:

- Finalisacion di Phase 1A di Gateway 2030
- Instalacion di un di seis lane adicional di siguridad na Checkpoint Alpha
- Implementacion di gate automatiza pa

inmigracion y eliminacion di proceso manual di scanning di boarding pass, mehorando eficiencia

- Reapertura di Taxiway Golf
 - Inversion conhunto cu U.S. Customs and Border Protection den tecnologia biometrico pa optimisa experiencia di pasahero
 - Atencion special pa e trahadonan di inmigracion cu material y ekipo nobo pa aumenta comodidad den trabou
 - Un acuerdo renoba cu Royal Schiphol Group pa contribui na aceleracion di progreso y desaroyo
- Minister Cicilia a expresa confiansa den e liderazgo ehecutivo di AAA N.V., describiendo e organisacion como un di e entidadnan strategico nacional mas importante pa economia, turismo y bienestar di Aruba.

“Nos aeropuerto ta e prome y ultimo impresion di Aruba. Inverti den calidad, eficiencia y recurso humano local ta esencial pa nos reputacion internacional y pa e futuro di nos isla,” segun Minister Cicilia.

MAN NA OBRA CU TRES PRIORIDAD PA E PARTI CARIBENSE DI E REINO

E seis islanan Caribense ta para dilanti reto urgente pa sigura crecemento economico y bienestar amplio pa futuro. Pa mehora e siguridad di existencia, laga e economia crece y fortifica e posicion di e islanan den e region, e Gabinete ta bay na obra p'esey cu tres prioridad. Esaki secretario di estado Eric van der Burg ta skirbi den e Carta di Maneho di Relacionnan den Reino. Secretario di estado Van der Burg:

“Habitante y empresario mester por conta cu un gobierno cu ta logra resultado y ta tuma paso concreto cu ta notabel den nan bida diario. Esaki ta e punto di salida cu ta duna direccion na ehecucion di e acuerdo di gobernacion pa parti Caribense di Reino. For di Den Haag nos ta compromete nos mes conhuntamente cu e paisnan y e islanan pa yega na resultado visibel pa e habitantenan. Maneho nobo na Hulanda Europeo lo wordo introduci basicamente na Boneiro, Sint Eustatius y Saba, a menos cu tin motibo di peso pa no haci esaki. Asina nos ta percura conhuntamente pa nos bay dilanti denter di Reino.”

Prioridad 1: Construi riba un gobernacion decisivo cu ta logra resultado

Hunto cu Boneiro, Sint Eustatius y Saba, e gabinete aki ta enfoca riba fortificacion di gobernacion publico: un gobierno decisivo y integro y cuadro legal cla. Ta sigui traha riba e accionnan cu a cuminsa cu e Agenda di Bon Gobernacion pa Hulanda Caribense, e revision di e leynan WolBES y FinBES y Ley di ampliacion di consehonan insular. Pa yuda preveni situacion preocupante manera esun na Selibon, gabinete ta fortifica capacidad di ehecucion y di gobernacion. E gabinete ta sigui



atende cu violacion di integridad, pasobra un gobernacion integro y fuerte ta base pa confiansa den gobierno. Asina, for di e aña aki, Boneiro, Sint Eustatius y Saba ta participa den e Monitor di Integridad y Siguridad. Servicio publico na Hulanda Caribense lo mehora mas ainda. Meta ta pa trece esaki na un nivel igual cu esun di Hulanda Europeo – online, via telefon y na bali.

Prioridad 2: Fortifica resiliencia social y economico y desaroyo sostenibel

E gabinete ta sostene desaroyo economico y autosuficiencia di e islanan. P'esey ta institui Plataforma di Economisch Groeiplatform Carib (Crecemento Economico Carib) pa conecta innovacion, empresario y capital na e seis islanan y den region miho cu otro. Banda di esaki, Instituto Nacional di Inversion cu ta bay institui nobo, lo habri pa parti Caribense di Reino. Esaki ta sosode den colaboracion cu

e ministerionan di Asuntonan Exterior, Asuntonan Economico y Finansa. Tambe ta bin un fondo cu cual empresario manera cunukero y piscado por haya acceso na financiamento pa, por ehempel, amplia nan negoshi. Pa atende cu pobresa na Boneiro, Sint Eustatius y Saba na un manera mas firme, gabinete ta pone €30 miyon structuralmente disponibel entrante aña 2027. E placa aki ta destina pa medida cu ta contribui na un minimo di existencia digno y na reduci e costo di bida.

Prioridad 3: Colaboracion efectivo denter di Reino

Si ta depende di e Gabinete lo bin un Conferencia di Reino pa probecha

miho di e oportunidadnan pa colaboracion cu Aruba, Corsou y Sint Maarten pa fortifica esakinan structuralmente. Esaki mester bira un combersacion recurente entre e cuater gobiernonan den Reino. Den esaki lo discuti desaroyo relevante, asunto y oportunidad pa colaboracion denter di Reino. Asina, por ehempel, desaroyo geopolitico por ofrece oportunidad nobo pa colaboracion regional, specialmente riba tereno manera energia, comercio y logistica.

E gabinete lo sigui elabora riba e prioridadnan aki den e proximo periodo, hunto cu e paisnan y e islanan.




PEN BEK

Pa kualkier informacion
solodipueblo@gmail.com
of
📞 585-9500

CENTRO DI BARIO NOORD CU HONOR DI HABRI E PROME MINI EXPO DI BIBLIOTECA NACIONAL PA TUR BARIO: PRESENTACION Y MINI EXPO

“CONOCE HISTORIA DI BOY ECURY”



NOORD - Centro di Bario Noord a orguyosamente presenta e prome mini expo cu Biblioteca Nacional Aruba (BNA)—Departamento Arubiana-Caribiana lo bay haci den tur bario.

Diahuebs tayer educativo y cultural, titula: “Cera conoci cu historia di ‘Boy Ecury’”, a tuma lugar na Centro di Bario Noord. Cu’n iniciativa cu tabata tin como meta pa pone lus riba bida y legado di un di e heroe mas importante di Aruba. Esaki a keda

presenta pa BNA—Departamento Arubiana-Caribiana. Cu e evento kier concientisa comunidad di un relato profundo di balor, sacrificio y amor pa libertad, inspira pa e historia di Boy Ecury durante Guerra Mundial II.

Boy Ecury, un huben Arubiano cu a demostra curashi sin igual, a bira un simbolo di resistencia contra opresion. Su participacion den e lucha clandestino contra e ocupacion Nazi na Hulanda



ta un fuente di inspiracion pa generacionnan actual y futuro. Cu e tayer aki, Centro di Bario Noord kier mantene bibo e memoria di e heroe aki, y alabes educa comunidad riba e balornan fundamental di libertad, husticia y patriotismo. E actividad a consisti di un sesion interactivo unda participantenan a haya oportunidad pa siña mas riba e bida di Boy Ecury, su rol den e resistencia, y e circunstancianan historico di e epoca di Guerra Mundial II. Mediante relato, material audiovisual y discusionnan guiya, e publico a conecta emocionalmente cu e historia, compronde su importancia y reflexiona riba su relevancia den nos sociedad actual.

Un elemento special tabata e Mini Expo cu a wordo presenta pa Biblioteca Nacional Aruba (BNA)—Departamento Arubiana-Caribiana. E exhibicion aki

a muestra documentonan historico, portretinan, y otro material relevante cu ta relata e bida di Boy Ecury y su contribucion na lucha pa libertad. E colaboracion cu BNA a enfatisa e importancia di preserva y comparti nos herencia cultural y historico cu e comunidad amplio.

Centro di Bario Noord ta kere firmemente cu educacion historico no solamente ta trata di pasado, pero tambe di forma un guia pa futuro. Door di comparti e historia di Boy Ecury, Centro ta busca pa inspira hoben y adulto pa reflexiona riba nan propio rol den comunidad y e impacto cu nan por tin ora nan defende balornan corecto.

E tayer a habri su porta pa tur hende interesa, incluyendo estudiante, docente, investigadornan, y miembronan di comunidad cu tin interes

den historia local y internacional. Ta un oportunidad unico pa siña, dialoga y conecta cu un parti esencial di identidad Arubiano.

Ademas, e evento a brinda un ambiente unda participante nan por a intercambia ideanan, haci pregunta, y comparti nan propio reflexionnan. E meta ta pa crea no solamente un momento di esneñansa, pero tambe un experiencia cu ta fortalece orguyo nacional y sentido di comunidad.

Un historia di balor. Un legado di sacrificio. Un fuente di orguyo Arubiano. E historia di Boy Ecury ta merece pa wordo conta, celebra y recorda—awor y semper. Centro di Bario Noord tabata tin e honor di habri e prome mini expo cu Biblioteca Nacional Aruba (BNA)—Departamento Arubiana-Caribiana lo bay haci den tur bario.—Noord Creciendo Hunto!

Parlamentario Jennifer Arends-Reyes: GATEWAY 2030 TA UN INVERSION ESENCIAL PA PROGRESO ECONOMICO Y FUTURO DI ARUBA



ORANJESTAD (27 di april 2026) – Lider di fraccion AVP den Parlamento y president di Comision di Turismo, Jennifer Arends-Reyes, a expresa su firme apoyo pa e proyecto Gateway 2030, cual segun e, ta representa un paso strategico y necesario pa fortalece economia di Aruba y garantiza crecimiento duradero pa nos pais.

Arends-Reyes a enfatisa cu cada fase cu ta completa den e proyecto Gateway 2030 ta un señal cla di progreso y modernisacion pa Aruba. Segun e lider di

fraccion, e inversionnan den infraestructura di aeropuerto no solamente ta mehora e experiencia di bishitante, sino tambe ta crea oportunidadnan nobo pa empleo, negoshi y innovacion den diferente sector di economia.

“ Gateway 2030 ta esencial pa progreso y economia di Aruba,” Arends-Reyes a declara, señalando cu un aeropuerto moderno y eficiente ta un pilar fundamental pa mantene Aruba competitivo den region Caribe y den mercado turistico internacional.



Parlamentario Arends-Reyes tambe a felicita tur trahado, ingeniero y profesional cu diariamente ta contribui na realizacion di e proyecto, reconociendo nan compromiso cu desaroyo di Aruba. Ela a recalca cu inversion den infraestructura no ta un gasto, sino un inversion directo den futuro di nos

economia y bienestar di nos comunidad.

Segun Arends-Reyes, turismo ta un di e motor principal di economia di Aruba, y modernisacion continuo di Aeropuerto Internacional Reina Beatrix ta vital pa sostene crecimiento economico, atrae mas bishitante y

fortifica posicion di Aruba como destino di calidad mundial.

Fraccion AVP ta sigui monitor progreso di e proyecto Gateway 2030 y lo continua traha constructivamente pa garantiza cu e desaroyo aki ta beneficia tur ciudadano di Aruba, awor y den futuro.

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



SOPI DI LETRANAN

ARBUSTO
BANCO
CARRETILLA
ESTANQUE
FLORES
FUENTE
INVERNADERO
MANGUERA
PALA
PARTERRE
PLANTAS
SETO
TIJERAS


Z	M	A	N	G	U	E	R	A	M	I	N	W	B
E	T	V	E	U	Q	N	A	T	S	E	Y	O	R
R	E	M	F	U	E	F	B	A	B	A	N	C	O
R	X	X	A	L	A	P	G	O	U	Q	A	D	R
E	O	R	E	D	A	N	R	E	V	N	I	E	N
T	C	A	R	R	E	T	I	L	L	A	O	C	K
R	W	J	X	W	O	S	S	E	R	O	L	F	W
A	K	V	D	S	A	T	A	T	H	W	T	Y	D
P	O	A	D	T	P	F	S	E	R	I	E	B	S
Y	O	T	N	W	U	V	Y	U	J	B	R	K	Z
P	T	A	E	E	Q	W	W	E	B	H	J	R	E
U	L	E	N	S	G	U	R	M	T	R	C	Z	R
P	A	T	Y	K	K	A	G	U	Q	Z	A	I	Z
P	E	X	B	B	S	P	T	R	C	I	G	D	V

SUDOKU

					7			9
3			2				7	6
	5	6	8	4				
		2	9				3	
			7				1	
	4				8			
5		3		8		1		
								8
2	9							

	7		4				5	
3			7					
6		4				8		
8						2		
	3						4	6
9		7			6			8
2					4	1		
		5			8		3	
				2	7			

		1					6	
	4		9					2
				7	3	4		
1			3			7	5	
	3				2			9
5	9		1		6			
8				6			3	
			5	9				1
					4			



Oracion di dia

Un feliz dia bendiciona yena cu gracia di Dios

”Lo Bo ta sacerdote pa semper na e mesun manera cu Melkisedec.”
(Hebreunan 7, 17b)

Ruman aki nos ta mira Hesus cu e titulo Sacerdote/Rey di Husticia pa semper, bunita titulo pa Hesus aunke Hesus no mester di ningun introduccion of titulo paso E ta Dios y Dios ta Amor. Asina mes den Hesus nos por experencia Amor, E Amor Unico cu nos tur ta anhela consciente y inconscientemente nos tur ta anhela di experencia E Amor di Dios.

Ta dificil pa esey sosode? Ta bon pa nos sa cu tur cos ta depende di con habri nos curason ta pa Hesus y con nos ta permiti Spirito Santo move den nos.

Diadomingo nos a scucha cu nos tin e donnan y awor ta keda nos nada mas cu resa y pidi Spirito Santo habri nos curason pa nos experencia y pone e donnan den practica y asina acepta y cumpli cu Dios su boluntad den nos bida y nos biba!

Oracion:Hesus mare nos tur por reconoce cu Abo ta nos Rey di Husticia y acerca Bo curason misericordioso pa nos salvacion.
Amen

Paardenbaaistraat 10, Oranjestad, Aruba Tel.: (297) 525 - 7555

www.lottoaruba.com

Resultado: Sorteo di Merdia - April 27, 2026

Sorteo # 4957
4159
6720
9780
FP
Sorteo # 4957
0264
X2
Sorteo # 3013
3087
Sorteo # 4957
0107
Sagitario
Sorteo # 1831
699
X2

Sorteo #	Joker Letter
0 x Jackpot	Proximo Jackpot
0 x Match 4+	200.000,-
0 x Match 4	
0 x Afl. 12,00	
Sorteo #	Proximo Jackpot
0 x Jackpot	58.000,-
0 x Match 4	
0 x Afl 8,00	

Sorteo #	Mega Ball
0 x Jackpot	Proximo Jackpot
0 x match 4	1.300.000,-
0 x Afl. 500,00	
0 x Afl 50,00	
0 x Afl.15,00	
	Afl. 2.100.000,-
Sorteo #	

	Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado: Sorteo di Anochi 7 - April 27, 2026	
CATOCCHI Sorteo # 8833 7080 0345 1849 MULTI-X FP BIG 4 Sorteo # 7877 6702 MULTI-X X2 10FF Sorteo # 2582 3345 ZODIAC Sorteo # 6636 4684 Cancer LUCKY 3 Sorteo # 1566 355 MULTI-X	LOTTO 5 Sorteo # 2691 0 x Jackpot 0 x Match 4+ 10 x Match 4 281 x Afl. 12,00 LOTTO DI DIA Sorteo # 7163 0 x Jackpot 10 x Match 4 198 x Afl 8,00	02-12-24-27-28 Joker 22 Letter J Proximo Jackpot 210.000,- 04-05-11-14-17 Proximo Jackpot 61.000,-
MEGA Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00 MEGA PLUS	MEGA Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00 MEGA PLUS	Mega Ball Proximo Jackpot 1.300.000,- Afl 2.100.000,-
KORSOU Sorteo #	KORSOU Sorteo #	Sorteo #

FORTALEZA PA FAMIA

Scirbi pa Pastor Marcel Balootje.

NUNCA LUBIDA LOCUAL DIOS A HACI PA BO

For di e caminda di mas secur den bo bida,
Dios a libra bo.

Ora bo tabata malo na cama pa muri Dios
a lanta bo.

Ora bo no tabatin trabao Dios a sostene bo.

Ora bo matrimonio tabata na werki Dios a restaura tur cos.

Ora financieramente bo tabata kibra, ta Dios ta Esun cu a habri portanan pa bo.

Ora tur hende tabata papia y bisa cu e no ta lanta mas, Dios a lanta bo.

Ora tur hende bandona bo, Dios semper ta
cu bo, e no ta laga bo desampara.

Ora droga y alcohol danja bo organo, Dios tin poder pa sana bo.

Ora bo mente ta cansa cu stress y depresion y bo salud mental a bay atras Dios tey pa bo.

Ora diabel mester ganja bo y bisa bo pa kita bo bida, Dios su brasa ta habri pa bo.

Ora mal noticia mester drenta Senjor ta bo consuelo.

Ora e enemigo mester lanta contra bo,
 Señor ta bo refugio y bo fortaleza.

Ora hende papia riba bo y hasta saca
mentira pa danja bo number, Dios ta
defende bo.

Ta difícil lubida tur locual Dios ta haci pa nos, pasobra locual Dios por haci pa nos. Ta Dios so por hacie pa nos, tin cosnan secreto den nos bida, entre nos cu Dios, cu ningun hende no sa , pero nos no por lubida cu ta Dios a hacie pa nos.

Salmo 103:1-4 ta para scirbi: Bendiciona Senjor . O mi alma, y tur loke tin den Mi bendiciona Su number santo, Bendiciona Senjor O Mi alma, y no lubida ni un di su beneficianan.

Kende ta pordona tur bo inikidatnan,
Kende ta cura tur bo malesanan. Kende ta
redimi bo bida for di destruccion, kende
ta corona bo cu misericordia y compasion.

Y si un hende por a lubida ta para scirbi

den 1 Juan 1:9 pa nos tur igual, pa ningun
hende no sinti nan mes culpabel y pa diabel
no cohe bentaha den bo bida e palabra di
Dios ta bisa lo siguiente;

Si nos confesa nos pica E ta fiel y husto di
pordona nos, nos picanan y libra nos di tur
inhusticia.

Tene cuenta cu Dios ta pordona nos pica ora nos bini su dilanti cu un curason arepentí, y nos reconece nos fout, pasobra no por tin pordon si un hende no reconece su error, hasta den corte di mundo, si un hende reconece cu e a haci robes y ta pidi despena di curason, y no despena pa cara di juez y famia, pero despena di berdad pa locual cu e a haci, Dios mes lo haci sobra pe.

Si un hende para banda di bo ora bo ta malo, ta algo di aprecia tur momento, pero no lubida cu ta Dios a sanabo, y a lanta bo for di bo cama di malesa. Pesey no lubida di gradici Dios, y no bandona caminda di Dios despues cu E a haci cosnan grandi pa bo.

Semper mester tin un lugar den bo curason pa gradici Dios, pasobra salbacion ta bini solamente di nos Senjor Hesus Cristo, no tin salbacion den ningun otro (Hechonan 4:32).

Bendicion, liberacion,
sanacion, restauracion, ta bini solamente
di Dios.

Hende mester reconece e grandesa di Dios den nan bida, den un palabra bisa cada ken sa kico Dios a haci den nan bida. Cada ken tin un motibo di para keto un rato y bisa:

O Tata mi ta gradici Bo pa tur locual bo
a haci pami, pasobra si no tabata pa Bo
Dios, awe mi no tey.

Sinceramente, Pastor Marcel Balootje.

FORTALEZA PA FAMILIA

Scirbi pa Pastor Marcel Balootje

PUEBLO PLEASE, PREPARA PA E BINIDA DI CRISTO HESUS

No ta asunto di spanta hende, pero ta asunto di concientisa hende.

Ora nos ta papia di pueblo nos ta papia di tur hende, pasobra Dios no kier pa ningun hende bay perdi, pero pa tur yega na conocimiento di e berdad.

No ta asunto di un hende so mester biba den santidad, pero tur hende mester biba den santidad, ningun hende cu ta biba den pica, of hende cu ta rechasa Cristo Hesus of hende cu no ta kere den Juan 3:16-19 y haci locual tin para scirbi den Romanonan 10:9-11 lo no por bay cu Senjor.

No ta asunto di religion, pero ta asunto di relacion, pasobra salvacion ta personal, no ta bay pa unda bo ta biba pasobra salvacion no ta den ningun pais pero den Solamente den Cristo Hesus (Hechonan 4:10-12).

Ta hopi confusion tin den mundo, y ta hopi e enemigo ta usando pa bruha tera, hopi hende cu mester sa miho, ta cayendo den trampa di enemigo y otro nan cu ta sigi nan tambe ta haci mesun cos.

Shonnan no tin cuenta di fecha ni anja, stop di kere den 2030, den binti 2050 of cu ta Israel,

Merca, China, Rusia, Iran, etc ta dicidi, pasobra ta para scirbi e Dia y e Ora ningun hende no sa.

Ta para scirbi cu ora e Cristo Hesus ta bini esun cu ta den cunucu no ta hanja chens di bisa esun cu ta den cas, ta para scirbi cu ora Cristo Hesus bini dos lo ta hunto uno lo bay y otro lo keda.

No sinta kibra cabes cu Rapto ni tampoco e di dos binida di Cristo, pero sea prepara, vigila, biba den santidad, pasobra sin pas y sin santidad ningun hende lo no mira Senjor. (Hebreonan 12:14).

Nos tur cu ta kere den Senjor sa cu algo ta bay sosode pasobra e escritura ta bisa asina, pasobra locual cu Hesus a bisa di dje den Mateo 24 y 25 ta muestra esey, locual tur profeta a bisa ta concluyendo, tur esaki nan ta Dios mes a papia cu nan, pa nos awendia por tene cuenta y hala mas cerca Dios.

Cuidao pasobra tin hopi mentira ta bay rond, tin hopi hende emociona, ta papia cosnan pa hala hende su atencion riba nan mes, pa tene hende na linja, y hopi di e cosnan ey no ta berdad, berdad ta locual ta para scirbi den e Palabra di Dios, kere den esey y prepara pa e binida di Cristo.

Un cos nos tur mester sa, cu esun cu kere lo ta salba, y esun cu no kere lo bay perdi, no tin asunto di rico ni pover, no tin asunto di religion, ni tampoco e region den cual bo ta biba, tene na cuenta cu ora Cristo Hesus ta bini, e ta bini na tur caminda mesun momento, y esey rond mundo lo sa, e lo no aparece, awe na Israel, mayan Merca, y otro siman na Rusia y China, tur hende por lesa y bolbe lesa den den 1 Thesalonisensenan Capitulo 5:1-11, pasobra nos tur sa locual e Palabra di Dios ta bisa cu lo sosode den 1 Thesalonisensenan 4: 14-18.

Un cos nos mester sa cu cielo y tera lo pasa ma e palabra di Dios lo no pasa. (Lucas 21:25-32).

Wak bon locual tin para scirbi den 2 Pedro 3:7-14, y laga nos hala mas cerca Senjor y prepara pa Su binida.

Un biaha mas prepara pa Su binida, y no bay tras, tras di esnan cu ta ganja pa complace hende, pero corda cu salvacion ta personal.

Sinceramente, Pastor Marcel Balootje.

"UN SIRBIDO NO TA MAS HALTO CU SU SHON." (HUAN 13,16)



E lectura ta conta Hesus su ehempel di sirbishi humilde tumando e posicion di un sirbido aunke E ta e Shon. E echo di sirbi otro no ta rebaha e dignidad di e shon ma hisa e balor y dignidad di esun cu su shon ta sirbi. Nos ta wordo yama pa nos tin un relacion cu Hesus y pa sigui'E. E ta recorda nos cu e logica di Dios semper ta diferente for di esun di nos. P'esey sigui Señor semper ta rekeri un conversion profundo di nos

tur. Un cambio den nos manera di pensa y biba. Habri nos curason pa scucha, permitiendone nos mes pa wordo ilumina y transforma di paden. Un punto clave caminda Dios y humanidad ta diferencia ta orguyo. Den Dios no tin orguyo pasobra E ta tur plenitud. Henter Su ser ta inclina na stima y duna bida den nos. Tene na cuenta cu nos ta sirbidonan di Cristo, no doñonan. E mester penetra y transforma nos

bida. Purba di busca e presencia di Dios den cada momento, yamando otronan bonbini manera Señor lo yama nos bonbini. Señor mes ta duna nos e oportunidad pa sirbi'E den otronan. Sirbi ta un bendicion.

Oracion: Maria, inspira mi curason pa sigui Hesus y refleha su amor na otronan. San Pio V, resa pa nos. Amen.